

D.R. 25/2006

RANG UNDANG-UNDANG

bernama

Suatu Akta untuk meminda Akta Pusat Jagaan 1993.

DIPERBUAT oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Pusat Jagaan (Pindaan) 2006.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*.

Pindaan seksyen 2

2. Akta Pusat Jagaan 1993 [*Akta 506*], yang disebut "Akta ibu" dalam Akta ini, dipinda dalam seksyen 2—

(a) dengan memasukkan selepas takrif "pegawai diberi kuasa" takrif yang berikut:

' "Pengarah Negeri" ertinya Pengarah Kebajikan Masyarakat suatu Negeri dan termasuklah masing-masingnya Pengarah Kebajikan Masyarakat Wilayah Persekutuan Kuala Lumpur, Wilayah Persekutuan Labuan dan Wilayah Persekutuan Putrajaya;'; dan

(b) dalam teks bahasa Inggeris, dengan menggantikan noktah di hujung takrif "relative" dengan koma bernoktah.

Pindaan seksyen 3**3. Seksyen 3 Akta ibu dipinda—**

- (a) dalam perenggan (a), dengan menggantikan perkataan "Akta Hospital Persendirian 1971 [*Akta 43*]" dengan perkataan "Akta Kemudahan dan Perkhidmatan Jagaan Kesihatan Swasta 1998 [*Akta 586*]";
- (b) dalam perenggan (b), dengan menggantikan perkataan "Akta Pelajaran 1961 [*Akta 43/1961*]" dengan perkataan "Akta Pendidikan 1996 [*Akta 550*]";
- (c) dalam perenggan (e), dengan memotong perkataan "atau" yang terdapat selepas koma bernoktah;
- (d) dalam perenggan (f), dengan menggantikan noktah dengan perkataan "; atau"; dan
- (e) dengan memasukkan selepas perenggan (fi, perenggan yang berikut:

"(g) mana-mana institusi yang dikecualikan daripada peruntukan Akta ini oleh Ketua Pengarah."

Pindaan seksyen 10**4. Subseksyen 10 Akta ibu dipinda—**

- (a) dalam subseksyen (3), dengan menggantikan perkataan "dua belas" dengan perkataan "enam puluh";
- (b) dengan menggantikan subseksyen (4) dengan subseksyen yang berikut:

"(4) Suatu salinan perakuan pendaftaran yang dikeluarkan oleh Ketua Pengarah di bawah seksyen ini hendaklah dipamerkan di tempat yang mudah dilihat di dalam premis yang dinyatakan dalam perakuan pendaftaran itu."; dan

- (c) dengan memasukkan selepas subseksyen (4) subseksyen yang berikut:

"(5) Jika berlaku apa-apa perubahan dalam apa-apa hal keadaan yang butir-butirnya dinyatakan dalam suatu perakuan yang dikeluarkan di bawah seksyen ini, orang yang kepadanya perakuan itu telah dikeluarkan

Pusat Jagaan (Pindaan)

3

hendaklah, dalam masa empat belas hari, memberitahu Ketua Pengarah dengan sewajarnya secara bertulis, dan Ketua Pengarah hendaklah mengeluarkan suatu perakuan pindaan sebagai ganti perakuan asal itu.

(6) Apabila berhenti mengendalikan suatu pusat jagaan, orang yang kepadanya perakuan pendaftaran itu telah dikeluarkan hendaklah menyerahkan perakuan itu kepada Ketua Pengarah dalam masa satu bulan dari tarikh pemberhentian itu."

Pindaan seksyen 11

5. Seksyen 11 Akta ibu dipinda—

- (a) dalam nota bahu, dengan menggantikan perkataan "Pengkanselan" dengan perkataan "Pembatalan";
- (b) dengan menggantikan perkataan "mengkanselkan" dengan perkataan "membatalkan"; dan
- (c) dalam perenggan (d), dengan menggantikan perkataan "dikansel" dengan perkataan "dibatalkan".

Seksyen baru 11A

6. Akta ibu dipinda dengan memasukkan selepas seksyen 11 seksyen yang berikut;

"Tafsiran

1 1A. Bagi maksud Bahagian ini, Ketua Pengarah termasuklah Pengarah Negeri."

Seksyen baru 16A

7. Akta ibu dipinda dengan memasukkan selepas seksyen 16 seksyen yang berikut:

"Kuasa untuk mengelak

16A. (1) Jika Ketua Pengarah atau mana-mana pegawai diberi kuasa mempunyai sebab yang munasabah untuk mempercayai bahawa mana-mana rumah, bangunan, premis atau tempat lain

digunakan sebagai suatu pusat jagaan yang tidak didaftarkan di bawah peruntukan Akta ini, Ketua Pengarah atau pegawai diberi kuasa boleh mengambil apa-apa langkah yang difikirkannya perlu atau dengan apa-apa cara mengelak pusat jagaan itu.

(2) Orang yang menggunakan rumah, bangunan, premis atau tempat itu sebagai pusat jagaan yang telah dilak hendaklah—

- (a) dalam masa dua puluh satu hari dari pengelakan itu mengemukakan kepada Ketua Pengarah atau pegawai diberi kuasa itu perakuan pendaftaran pusat jagaan itu; dan
- (b) menanggung apa-apa kos yang dilakukan berbangkit daripada tindakan itu.

(3) Lak itu hendaklah ditanggalkan jika—

- (a) orang itu mematuhi kehendak subseksyen (2); atau
- (b) suatu perintah mahkamah diperoleh terhadap orang itu supaya orang itu berhenti daripada menggunakan rumah, bangunan, premis atau tempat itu sebagai pusat jagaan,

mengikut mana-mana yang terdahulu.

(4) Ketua Pengarah atau pegawai diberi kuasa itu yang bertindak di bawah seksyen ini tidaklah bertanggung bagi apa-apa kos yang berbangkit daripada tindakan itu atau kerosakan kepada rumah, bangunan, premis atau tempat yang dilak di bawah seksyen ini melainkan jika kerosakan itu dilakukan dengan sengaja.

(5) Apa-apa tindakan yang diambil di bawah seksyen ini berkenaan dengan mana-mana rumah, bangunan, premis atau tempat lain tidak boleh melarang pendakwaan mana-mana orang yang menggunakan rumah, bangunan, premis atau tempat itu sebagai pusat jagaan dengan melanggar Akta ini."

Pindaan seksyen 18

8. Seksyen 18 Akta ibu dipinda—

- (a) dalam perenggan (e), dengan memotong perkataan "atau" yang terdapat selepas koma bernoktah;

- (b) dalam perenggan (f) dengan menggantikan koma dengan koma bernoktah; dan
- (c) dengan memasukkan selepas perenggan (f) perenggan yang berikut:
 - "(g) gagal menyebabkan suatu salinan perakuan pendaftaran itu dipamerkan mengikut subseksyen 10(4);
 - (h) gagal memberitahu Ketua Pengarah tentang apa-apa perubahan dalam apa-apa hal keadaan yang butir-butirnya dinyatakan dalam perakuan itu mengikut subseksyen 10(5); atau
 - (i) gagal menyerahkan perakuan pendaftaran itu apabilaberhenti mengendalikan suatu pusat jagaan mengikut subseksyen 10(6),".

Penggantian seksyen 21

9. Akta ibu dipinda dengan menggantikan seksyen 21 dengan seksyen yang berikut:

"Pemulaan pendakwaan

21. Tiada pendakwaan bagi suatu kesalahan di bawah Akta ini atau mana-mana peraturan yang dibuat di bawah Akta ini boleh dimulakan kecuali oleh atau dengan keizinan bertulis Pendakwa Raya."

Seksyen baru 21A

10. Akta ibu dipinda dengan memasukkan selepas seksyen 21 seksyen yang berikut:

"Pengkompunan kesalahan

21A. (1) Ketua Pengarah boleh, dengan keizinan Pendakwa Raya, mengkompaun apa-apa kesalahan yang dilakukan oleh mana-mana orang terhadap Akta ini atau mana-mana peraturan yang dibuat di bawah Akta ini dengan membuat suatu tawaran bertulis, dalam borang yang ditetapkan, kepada orang yang disyaki secara munasabah telah melakukan kesalahan itu

Rang Undang-Undang

untuk mengkompaunkan kesalahan itu apabila dibayar kepada Ketua Pengarah suatu amaun wang yang tidak melebihi lima puluh peratus daripada amaun denda maksimum bagi kesalahan itu dalam masa yang dinyatakan dalam tawaran itu.

(2) Sesuatu tawaran di bawah subseksyen (1) boleh dibuat pada bila-bila masa selepas kesalahan itu dilakukan, tetapi sebelum apa-apa pendakwaan baginya telah dimulakan, dan jika amaun yang dinyatakan dalam tawaran itu tidak dibayar dalam masa sebagaimana yang dinyatakan dalam tawaran itu, atau dalam apa-apa tempoh lanjutan yang dibenarkan oleh Ketua Pengarah, pendakwaan bagi kesalahan itu boleh dimulakan pada bila-bila masa selepas itu terhadap orang yang kepadanya tawaran itu telah dibuat.

(3) Jika sesuatu kesalahan telah dikompaunkan di bawah subseksyen (1), tiada pendakwaan boleh dimulakan berkenaan dengan kesalahan itu terhadap orang yang kepadanya tawaran untuk mengkompaun itu dibuat."

HURAIAN

Rang Undang-Undang ini bertujuan untuk meminda Akta Pusat Jagaan 1993 ("Akta 506").

2. *Fasal 1* mengandungi tajuk ringkas dan peruntukan tentang permulaan kuat kuasa Akta yang dicadangkan.

3. *Fasal 2* bertujuan untuk meminda seksyen 2 Akta 506 untuk mengadakan takrif baru "Pegawai Negeri" yang merujuk kepada Pegawai Kebajikan Masyarakat suatu Negeri dan termasuklah masing-masing Pegawai Kebajikan Masyarakat Wilayah Persekutuan Kuala Lumpur, Pegawai Kebajikan Masyarakat Wilayah Persekutuan Labuan dan Pegawai Kebajikan Masyarakat Wilayah Persekutuan Putrajaya.

4. *Fasal 3* bertujuan untuk meminda perenggan 3(b) Akta 506 berikutan pemansuhan Akta Pelajaran 1961 [*Akta 43/1961*] dan Akta Hospital Persendirian 1971 [*Akta 43*] masing-masingnya oleh Akta Pendidikan 1996 [*Akta 550*] dan Akta Kemudahan dan Perkhidmatan Jagaan Kesihatan Swasta 1998 [*Akta 586*]. *Fasal 3* juga bertujuan untuk meminda seksyen 3 untuk membolehkan Ketua Pegawai mengecualikan mana-mana institusi daripada peruntukan Akta ini.

5. *Fasal 4* bertujuan untuk meminda subseksyen 10(3) Akta 506 untuk melanjutkan tempoh kesahan perakuan pendaftaran daripada dua belas bulan kepada enam puluh bulan. Kehendak untuk mempamerkan perakuan pendaftaran

diperuntukkan dalam subseksyen 10(4). Subseksyen 10(5) menghendaki orang yang kepadanya perakuan pendaftaran dikeluarkan untuk memberitahu Ketua Pengarah tentang apa-apa perubahan yang berlaku dalam apa-apa hal keadaan yang butir-butirnya dinyatakan dalam perakuan pendaftaran itu. Subseksyen 10(6) mengadakan peruntukan bagi penyerahan perakuan apabila suatu pusat jagaan dltutup.

6. *Fasal 5* bertujuan untuk meminda subseksyen 11 Akta 506 untuk menggantikan perkataan "pengkanselan" dengan perkataart "pembatalan" yang lebih sesuai.

7. *Fasal 6* bertujuan untuk memasukkan seksyen baru 11 A ke dalam Akta 506 yang membolehkan Pengarah Kebajikan Masyarakat Negeri menjalankan tugas bagi pendaftaran pusat jagaan.

8. *Fasal 7* bertujuan untuk memasukkan seksyen baru 16A ke dalam Akta 506 yang memberi kuasa kepada Ketua Pengarah dan pegawai diberi kuasa untuk mengelak pusat jagaan yang tidak berdaftar.

9. *Fasal 8* bertujuan untuk meminda seksyen 18 Akta 506 untuk menjadikannya suatu kesalahan bagi orang yang tidak mempamerkan perakuan pendaftaran, tidak memberitahu Ketua Pengarah tentang apa-apa perubahan yang berlaku dalam apa-apa hal keadaan yang butir-butirnya dinyatakan dalam perakuan pendaftaran atau tidak menyerahkan perakuan itu apabila pusat jagaan itu ditutup.

10. *Fasal 9* bertujuan untuk meminda seksyen 21 Akta 506 berhubung dengan pendakwaan supaya selaras dengan Perkara 145 Perlembagaan Persekutuan.

11. *Fasal 10* bertujuan untuk memasukkan seksyen baru 21 A ke dalam Akta 506 untuk membolehkan apa-apa kesalahan yang dilakukan di bawah Akta ini atau mana-mana peraturan yang dibuat di bawah Akta ini dikompaun.

IMPUKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini.

[PN(U)2458]